

四庫全書

集部

# 欽定四庫全書

集部

御選歷代詩餘卷五十四

詳校官中書<sub>臣</sub>潘有為

侍讀<sub>臣</sub>孫球覆勘

總校官進士<sub>臣</sub>朱 鈐

校對官學政<sub>臣</sub>翁樹棠

謄錄監生<sub>臣</sub>馬世昌

欽定四庫全書

御選歷代詩餘卷五十四目錄

起九十一字至九十三字

滿江紅

又一體

呂渭老

呂本中

葉夢得

二首

嚴羽

戴山隱

醉翁操 又一體

蘇軾

辛棄疾

八六子 又一體

晁補之

采蓮令

柳永

夏雲峰

柳永

十二時慢

朱雍

淒涼犯

又一體

吳文英

法曲獻仙音

又一體

柳永

尉遲杯

晁補之

意難忘

蘇軾

周邦彥

陳允平

張炎

林正大  
二首

何夢桂

范晞文

宋遠

塞翁吟

周邦彥

方千里

楊澤民

吳文英

陳允平

張炎

趙文

露華

張翥

法曲獻仙音

又一體

周邦彥

姜夔

方千里



楊澤民

吳文英

陳允平

王沂孫

張炎

李彭老

樓采

勸金船

又一體

張先

漢宮春

陳允平

宣清

柳永

金盞倒垂蓮

晁補之

轆轤金井

劉過

探芳新

吳文英

東風齊著力

張大烈

雪獅兒

又一體

張雨

掃花遊

王沂孫

薄媚摘徧

趙以夫

滿江紅

又一體

吳文英

二首

詹正

彭芳遠

如魚水

柳永

臨江仙

又一體

柳永

浣溪紗慢

周邦彥

瀟湘夜雨

趙長卿

梅子黃時雨

張炎

惜秋華

吳文英 二首

前調 又一體

吳文英 二首

露華憶

周密

探春

吳文英

淒涼犯

又一體

姜夔

卜算子慢

又一體

張先

滿庭芳

黃公度

玉漏遲

蔣捷

洞仙歌 又一體

僧寶月

轆轤金井 又一體

劉過

選歷代詩餘卷五十四目錄



欽定四庫全書

御選歷代詩餘卷五十四

起九十一字  
至九十三字

司經局洗馬掌局事兼翰林院修撰加二級臣王奕清奉

旨校刊

滿江紅

又一體雙調  
九十一字

滿江紅

呂渭老

燕拂危檣斜日外數峰凝碧正暗潮生渚暮風飄席初

過南村沽酒市連空十頃菱花白想故人輕箴障遊絲  
聞遙笛魚與鴈通消息心與夢空牽役到如今相見  
怎生休得斜把琵琶傳密意一襟新月橫空碧問甚時  
同作醉中仙煙霞客

前調

呂本中

東里先生家何在山陰溪曲對一川平野數間茆屋昨  
夜江頭新雨過門前流水清如玉抱小橋回合柳參天  
搖新綠疎籬下叢叢菊虛檐外蕭蕭竹歎古今得失

是非榮辱須信人生歸去好世間萬事何時足問此春  
春釀酒何如今朝熟

前調

重陽賞菊時  
余已除代

葉夢得

一朵黃花先催報秋歸消息滿芳枝凝露為誰裝飾便  
向尊前揅醉倒古今同是東籬側問何須特地賦歸來  
拋彭澤 回首去年時節開口笑真難得使君今那更  
自成行客霜鬢不辭重揷滿他年此會何人憶記多情  
曾伴小闌干親攀摘

前調

葉夢得

雪後郊原煙林外梅花初拆春欲半猶自探春消息一  
眼平蕪看不盡夜來小雨催新碧笑去年攜酒折花人  
花應識 蘭舟漾城南陌雲影澹天容窄遶風漪十頃  
暝浮晴色恰是槎頭收釣處坐中仍有江南客問如何  
兩槳下苕溪吞雲澤

前調

送廖叔  
仁赴闕

嚴羽

日近觚稜秋漸滿蓬萊雙闕正錢塘江上潮頭如雪把

酒送君天上去瓊琚玉珮鵷鴻列丈夫身富貴等浮雲  
看名節 天上事吾能說今老矣空凝絕對西風慷慨  
唾壺歌缺不灑世間兒女淚難堪親友中年別問相思  
他日鏡中看蕭蕭髮

前調

戴山隱

醉倚紅樓長空外行雲遙駐甚淒涼孤吹引商刻羽薄  
夜冷侵沙浦鴈老龍吟徹寒潭雨暮涼飈一陣捲潮來  
驚飛去 重欲聽知何處誰為我胡牀據謾尋尋覓覓

凝情如許舊日山陽猶有恨杏花明月今誰賦恐憑闌  
人有愛梅心空愁佇

醉翁操

又一體雙調  
九十一字

醉翁操

蘇軾

琅然清圓誰彈響空山無言惟翁醉中和其天月明風  
露娟娟人未眠荷蕢過山前曰有心也哉此賢 醉翁  
笑詠聲和流泉醉翁去後空有朝吟暮怨山有時而童

巔水有時而回川思翁無歲年翁今為飛仙此意在人間試聽徽外三兩絃

前調

辛棄疾

長松之風如公肯余從山中心與吾兮誰同湛湛千里之江上有楓噫送子於東望君之門兮九重女無悅已誰適為容不龜手藥或一朝兮取封昔與遊兮皆童我獨窮兮今翁一魚兮一龍勞心兮忡忡噫命與時逢子之所食兮萬鍾

八六子

又一體雙調  
九十一字

八六子

重九呈  
祖禹叔

晁補之

喜秋晴澹雲縈縷天高羣鴈南征正露冷初減蘭紅風  
緊潛彫柳翠愁人漏長夢驚重陽景物淒清漸老何  
時無事當歌好在多情暗自想朱顏竝遊同醉宦名疆  
鎖世路蓬萍難相見賴有黃花滿把從教綠酒深傾醉  
休醒醒來舊愁旋生



采蓮令

雙調九  
十一字

采蓮令

柳永

月華收雲澹霜天曙西征客此時清苦翠娥執手送臨  
岐輶輶開朱戶千嬌面盈盈竚立無言有淚斷腸爭忍  
回顧一葉蘭舟便恁急槳凌波去貪行色豈知離緒  
萬般方寸但飲恨脈脈同誰語更回首重城不見寒江  
天外隱隱兩三煙樹

夏雲峰

雙調九  
十一字

夏雲峰

柳 永

宴堂深軒楹雨輕壓暑氣低沉花洞彩舟泛竿坐繞清  
潯楚臺風快湘簾冷永日披襟坐久覺疎絃脆管時換  
新音 越娥蕙態蘭心逞妖艷昵歡邀寵難禁筵上笑  
歌間發舄履交侵醉鄉深處須盡興滿酌高吟向此免  
名疆利鎖虛費光陰

十二時慢

雙調九十一字即十二時長調故加慢字也

十二時慢

梅

朱雍

粉痕輕謝池泛玉波暖琉璃初展靚靚芳塵冥春浦水  
曲漪生遙岼麝氣柔雲容影淡正日邊寒淺閒院寂幽  
管聲中萬感併生心事曾陪瓊宴春暗南枝依舊但  
得當初繾綣畫永亂英繽紛解珮映人輕盈面香暗酒  
醒處年年共副良願

淒涼犯

又一體雙調九十一字亦名瑞鶴仙引引或作影與瑞鶴仙無涉姜夔自度實九十三字此亦後人所損也

淒涼犯

賦重臺水仙

吳文英

空江浪闊清塵凝層層刻碎冰葉水邊照影華裾曳翠  
露搔淚濕湘煙暮合塵韞凌波半涉怕臨風欺瘦骨護  
冷素衣疊樊姊玉奴恨小鈿疎唇洗妝輕怯殢人最  
苦粉痕深幾重愁靨花溢香濃猛熏透霜綃細摺倚瑤

臺十二金錢暈半減

法曲獻仙音

又一體雙調  
九十一字

法曲獻仙音

柳永

追想秦樓心事當年便約于飛比翼悔恨臨岐處正攜  
手翻成雲雨離析念倚玉偎香前事慣輕擲慣憐惜  
饒心性正厭厭多病柳腰花態嬌無力早是乍清減別  
後忍教愁寂記取盟言少愁煎刺好將息遇佳景臨風

對月事須時恁相憶

尉遲杯

雙調九  
十一字

尉遲杯

晁補之

去年時正愁絕過却紅杏飛沉吟杏子青時追悔負好  
花枝今年又春到傍小闌日日數花期花有信人却無  
憑故教芳意遲遲及至待得融怡未攀條拈蕊又歎  
春歸怎得春如天不老更教花與月相隨儘歸路拍手

攔街笑人沉醉如泥

意難忘

仙呂曲也取以名  
調雙調九十二字

意難忘

蘇軾

花擁鴛房記拖肩髻小約鬢眉長輕身翻燕舞低語轉  
鶯簧相見處便難忘肯親度瑤觴向夜闌歌翻郢曲帶  
換韓香別來音信難將似雲收楚峽雨散巫陽相逢  
情有在不語意難量此箇事斷人腸怎禁得恁惶待與

伊移根換葉試又何妨

前調

周邦彥

衣染鴛黃愛停歌駐拍勸酒持觴低鬟蟬影動私語口  
脂香檐露滴竹風涼擽劇飲淋浪夜漸深籠燈就月子  
細端相知音見說無雙解移宮換羽未怕周郎長顰  
知有恨貪耍不成妝些箇事惱人腸試說與何妨又恐  
伊尋消聽息瘦損容光

前調

次周美  
成韻

陳允平



額粉宮黃襯桃花扇底歌送瑤觴裙拖金縷細衫唾碧  
花香瓊珮冷玉肌涼羅襪步滄浪漫共伊心盟意約眼  
覷睂相連環未結雙雙似桃源誤入初嫁劉郎瓏璵  
仙子髻綽約道家妝千種恨九迴腸雲雨夢猶妨誤少  
年紅消翠減虛度風光

前調

張炎

風月吳娃柳陰中認得第二香車春深妝減豔波轉影  
流花鶯語滑透紋紗有低唱人誇怕誤却周郎醉眼倚

扇佯遮 底須拍碎紅牙聽曲終奏雅可是堪嗟無人  
知此意明月又誰家塵滾滾老年華情付在琵琶更歎  
我黃蘆苦竹萬里天涯

前調

拈李白  
蜀道難

林正大

蜀道登天望峨眉橫絕石棧相連西來當鳥道逆浪俯  
回川猿與鶴莫攀緣九折崢嶸巖窈窕咫尺捫參歷井回  
首驚歎 西遊何日當還聽子規啼月愁減朱顏連峰  
天一握飛瀑壑爭喧排劒閣越天關豺虎橫朝昏問錦

城雖云樂土何似家山

前調

拈黃庭堅  
煎茶賦

林正大

洶洶松風更浮雲皓皓輕度春空精神新發越賓主少  
從容犀箸厭滌昏懣茗盃策竒功待試與平章甲乙為  
問涪翁建谿日鑄爭雄笑羅山梅嶺不數嚴邛胡桃  
添味永甘菊助香濃投美劑與和同雪滿兔甌溶便一  
枕莊周蝶夢安樂窩中

前調

何夢桂

避暑林塘數元戎小隊一簇紅妝旌旌雲影動簾幙水  
沉香金縷徹玉肌涼慢拍舞輕颺更一般輕絃細管孤  
竹空桑風姨昨夜癡狂向華峰吹落雲錦天裳波神  
藏不得散作滿池芳移彩鷁柳陰傍揅一醉淋浪向晚  
來歌闌飲散月在紗牕

前調

范晞文

清淚如鉛歎咸陽送遠露冷銅仙巖花紛墮雪津柳暗  
生煙寒食後暮江邊草色更芊芊四十年留春意緒不

似今年 山陰欲棹歸船暫停杯  
雨外舞劍燈前重逢  
應未卜此別轉堪憐  
憑急管倩繁絃思苦調難傳  
望故鄉都將往事付與啼鵲

前調

題樟鎮華光閣誌別

宋 遠

雞犬雲中笑種桃道士虛費春風  
山城看過鴈春水夢  
為龍雲上下燕東西久別各相逢  
向夜深江聲浦樹燈  
影漁篷  
舊游新悶重重便十分談笑一樣飄蓬  
元經  
推意氣丹鼎賺英雄  
年易老世無窮春事苦匆匆更與

誰題詩藥市沽酒新豐

塞翁吟

義取塞上翁事琴操也遂  
以名詞雙調九十二字

塞翁吟

周邦彥

暗葉啼風雨。牕外曉色。朧朧散水。麝小池東。亂一岸芙蓉。蘄州簾展。雙紋浪。輕帳翠縷如空。夢遠別淚痕重。澹鉛臉斜紅。忡忡嗟顚顚。新寬帶結羞豔冶都消鏡中。有蜀紙堪憑。寄恨等今夜。灑血書詞。剪燭親封。菖蒲漸

老早晚成花教見薰風

前調

次周美  
成韻

方千里

暮色催更鼓庭戶月影朧朧記舊跡玉樓東看枕上笑  
蓉雲屏幾軸江南畫香篆燼煖煙空睡起處繡衾重尚  
殘酒微紅 忡忡徑分散歌稀宴少懷麗質渾如夢中  
苦寂寞離情萬緒似秋後怯雨芭蕉不展愁封何時細  
語此夕相思曾對西風

前調

芙蓉次周  
美成韻

楊澤民

院宇臨池水橋邊遶水隴  
橋左右水西東水木兩笑  
蓉低疑洛浦凌波步高如  
弄玉凌空葉百疊蕊千重  
更都染輕紅  
忡忡能消盡憂心似結看  
豔色渾如夢中  
為愛惜芳容未盡好移去  
滿插家園特與培封年年  
對賞朝朝披翫麗質香風

前調

饒梅津除  
郎赴闕

吳文英

有約西湖去移棹曉折芙蓉  
算終是稱心紅染不盡薰  
風千桃過眼春如夢還認  
錦疊雲重弄晚色舊香中旋



撐入深叢 從容情猶賦冰車健筆人未老南屏翠峰  
轉河影浮槎信早素妃叫海目歸來太液池東紅衣卸  
了結子成蓮天勁秋濃

前調

次周美成韻

陳允平

睡起鸞釵金約鬢影朧臃檐珮冷玉丁東鏡裏對笑  
蓉秦箏倦理梁塵暗惆悵燕子樓空山萬疊水千重一  
葉漫題紅 忡忡從別後殘雲斷雨餘香在鮫綃帳中  
更懊恨燈花無準寫幽悵錦織回文小字斜封無人為

託欲倩賓鴻立盡西風

前調

友雲

張炎

交到無心處出岫細話幽期看流水意俱遲且澹薄相  
依凌霄未肯為霖去物外共鶴忘機迷古洞掩晴暉翠  
微濕紅衣飛飛垂天翼飄然萬里愁日暮佳人未歸  
尚記得巴山夜雨耿無語共話生平都付陶詩休題五  
朶莫問陽臺不贈相思

前調

趙文

坐對梅花笑還記初度年時名利事總成非謾老矣何  
為吳山夜月閩山霧回首鬢影如絲嬾更問斗牛箕強  
憑醉成詩閒思嗟漂泊浮雲飛絮曾跌蕩春風柘枝  
便萬里金臺築就已長分采藥龐公抱墓義之百年政  
爾一笑尊前兒女牽衣

露華

雙調九  
十二字

露華

張翥

瀛洲種玉總付與花神  
月底深斲琢就瑤笄光映鬢雲  
斜矗幾度借取搔頭別試漢宮妝  
束風露冷幽香半襟  
淡佇闌曲 亭亭雪豔愁獨愛粉沁冰筒  
髮撫金粟石  
上那回磨斷爭忍輕觸一自楚客歸來  
珠履舊遊誰續  
秋夢起殘妝半簪墜綠

法曲獻仙音

又一體雙調九十二字有以  
下半闕起韻屬上者非是

法曲獻仙音

周邦彥

蟬咽涼柯燕飛塵幙漏閣籤聲時度倦脫綸巾困便湘  
竹桐陰半侵庭戶向抱影凝情處時聞打牕雨 耿無  
語歎文園近來多病情緒嬾尊酒易成間阻縹緲玉京  
人想依然京兆眉嫵翠幙深中對徽容空在紈素待花  
前月下見了不教歸去

前調

張彥功  
官舍

姜夔

虛閣籠寒小簾通月暮色偏憐高處樹隔離宮水平馳  
道湖山盡入樽俎奈楚客淹留久砧聲帶愁去 屢回

顧過秋風未成歸計誰念我重見冷楓紅舞喚起淡妝  
人問逋仙今在何許象筆鸞牋甚而今不道秀句怕平  
生幽恨化作沙邊煙雨

前調

次周美  
成韻

方千里

庭葉飄寒砌蟲催織夜色迢迢難度細剔燈花再添香  
獸淒涼洞房朱戶見鳳枕羞孤另相思灑紅雨有誰  
語道年來為郎憔悴音問隔回首後期尚阻寂寞兩愁  
山鎖閒情無限顰嫵嫩雪消肌試羅衣寬盡腰素問何

時夢裏趁得好風飛去

前調

次周美成韻

楊澤民

汀蓼收紅井梧凋綠  
嚶嚶征鴻南度靜聽寒砧悶歌孤  
枕蟾光夜深窺戶露暗滴芭蕉重蕭蕭本非雨  
砌蛩語怎知人漏長無寐念遊子惆悵路修道阻  
蛩起嬾晨妝自秋來眉黛誰嫵淨几明牕但無  
慘空對蠻素早知伊別後恁久悔教輕去

前調

和丁宏卷韻

吳文英

落葉霞翻敗牕風咽暮色淒涼深院瘦不關秋淚緣生  
別情鎖鬢霜千點悵翠冷搔頭燕那能語恩怨 紫簫  
遠記桃枝向隨春渡愁未洗鉛水又將恨染粉縞澀離  
箱忍重拈燈夜裁翦望極藍橋綵雲飛羅扇歌斷料鴛  
籠玉鎖夢裏隔花時見

前調

次周美  
成韻

陳允平

油幕收塵素紈招月一枕蘋香微度枕玉牙牀浣冰金  
斛薰風夜涼牕戶漸睡醒明河暗芭蕉幾聲雨 對誰



語念微容已成憔悴心期悞歸計欲成又阻寂寞燕樓  
空想弓彎着黛慵無淚墨愁牋縱回文難寫情素便山  
遙水邈幾度夢魂飛去

前調

聚景亭梅  
次草牕韻

王沂孫

層綠我我纖瓊皎皎倒壓波痕清淺過眼年華動人幽  
意相逢幾番春換記喚酒尋芳處盈盈褪花晚已消  
黯況淒涼近來離思應忘却月明夜深歸輦荏苒一枝  
春恨東風人似天遠縱有殘花灑征衣鉛淚都滿但殷

勤折取自遣一襟幽怨

前調

席上聽琵琶有感

張炎

雲隱山暉樹分溪影未放妝臺簾捲篝密籠香鏡圓窺  
粉花深自然寒淺正人在銀屏底琵琶半遮面語聲  
軟且休彈玉關愁怨怕喚起西湖那時春感楊柳古灣  
頭記小憐隔水曾見聽到無聲漫贏得情緒難翦把一  
襟心事散入落梅千點

前調

梅次周  
草窗韻

李彭老

雲木槎枒水渼搖落瘦影半臨清淺翠羽迷空粉容羞  
曉年華柱絃頻換甚何遜風流在相逢共寒晚 總依  
黯念當時看花游冶曾錦纜移舟寶箏隨輦池苑鎖荒  
涼嗟事逐鴻飛天遠香徑無人任蒼蘚黃塵自滿聽鴉  
啼春寂暗雨瀟瀟吹怨

前調

樓采

花匣么絃象匳雙陸舊日留歡情意夢到銀屏恨裁蘭  
燭香篝夜闌鴛被料燕子重來地桐陰鎖牕綺 倦梳

洗暈芳鈿自羞鸞鏡羅袖冷煙柳畫闌半倚淺雨壓荼  
蘼指東風芳事餘幾院落黃昏怕春鶯驚笑憔悴倩柔  
紅約定喚取玉簫同醉

勸金船

又一體雙調  
九十二字

勸金船

流杯堂  
倡和

張先

流泉宛轉雙開竇帶染輕紗皺何人暗得金船酒擁羅  
綺前後綠定見花影竝照與豔妝爭秀行盡曲名休更

再歌楊柳 光生飛動搖瓊甃隔障笙簫奏須知短景  
歡無足又還過清晝翰閣遲歸來傳騎恨留住難久異  
日鳳凰池上為誰思舊

漢宮春

雙調九  
十二字

漢宮春

芍藥

陳允平

開盡荼蘼正桑雲麥浪天氣如秋南國露梢半坼金粟  
絲頭溫香傍酒儘多嬌不識春愁鶯院悄輕陰弄晚何

人堪伴清遊 偏愛紫萸黃裊想金壺勝賞依舊揚州  
花前夜闌醉後翻堦句好記元暉此日風流雙鬢改一  
枝花底如今應為花羞

宣清

雙調九  
十二字

宣清

柳永

殘月朦朧小宴闌珊歸來輕寒森森背銀釭孤館乍眠  
擁重衾醉魄猶噤永漏頻傳前歡已去離愁一枕暗尋

思舊追遊神京風物如錦  
念擲果朋儕絕纓宴會當  
時曾痛飲命舞燕翻翻鳳樓  
鴛寢玉釵亂橫信任散盡  
高陽這歡娛甚時重恁

金盞倒垂蓮

雙調九  
十二字

金盞倒垂蓮

寄霸帥  
楊仲謀

晁補之

休說將軍解彎弓掠地崑嶺河源綵筆題詩綠水映紅  
蓮萼總是風流餘事會須行樂芳年只有一部隨軒脆

管繁紃 多情舊遊尚憶寄秋風萬里鴻鴈天邊未學  
元龍豪氣笑求田也莫為庭槐興歎便傷搖落悽然後  
會一笑猶堪醉倒花前

轆轤金井

一名四犯翦梅花一名錦園春一名月城春雙調  
九十二字此調初於劉過兩用醉蓬萊復合雪獅  
兒解連環  
故曰四犯

轆轤金井

席上贈馬  
僉判舞姬

劉過

翠眉重拂後房深自喚小蠻嬌小繡帶羅垂報濃妝纔



了堂虛夜悄但夜約鼓簫聲鬧一曲梅花尊前舞徹梨  
園新調 高陽醉山未倒看鞦飛鳳翼釵褪微溜秋滿  
東湖更西風涼早桃源路杳記流水泛舟曾到桂子香  
濃梧桐影轉月寒天曉

探芳新

雙調九  
十二字

探芳新

吳中元日承  
天寺遊人

吳文英

九街頭正軟塵潤酥雪消殘溜裊賞祇園花豔雲陰籠

畫層梯空麝散擁凌波紫翠袖歎年端連環轉爛漫遊  
人如繡腸斷迴廊竚久便寫意濺波傳愁蹙岫漸沒  
飄鴻空惹閒情春瘦椒杯香乾醉醒怕西牕人散後暮  
寒深遲迴處自攀庭柳

東風齊著力

雙調九  
十二字

東風齊著力

除夕

張大烈

爆竹驚寒疎梅送臘歲轉韶華振天簫鼓喧闐在鄰家

處處桃符貼換簪方勝秀隱嬌娃迎春早寶釵端整玉  
鬢排斜 心事暗中誇惟願取箕疇歛福頻加金尊滿  
祝初添海屋霞且飲今宵歲酒膽瓶開明日鮮花全收  
來隔簾春色澹柳抽芽

雪獅兒

又一體雙調  
九十二字

雪獅兒

張雨

含香弄粉便勾引遊騎尋芳城南城北別有西村斷港

冰澌微綠孤山路熟伴老鶴晚先尋宿怕凍損三花兩  
蕊寒泉幽谷 幾翻花影濯足記歸來醉卧雪深平屋  
春夢無憑鬢底鬧蛾爭撲不如圖畫相對展官梅風竹  
燒黃獨自聽竝笙調曲

掃花遊

雙調九  
十二字

掃花遊 綠陰

王沂孫

小庭陰碧遇驟雨疎風刺紅如掃翠交徑小問攀條弄

蕊有誰重到謾說青青比似花時更好怎知道一別漢  
南遺恨多少 清晝人悄悄任密護簾寒暗迷牕曉舊  
盟悞了又新枝嫩子總隨春老漸隔相思長亭路杳攪  
懷抱聽蒙茸數聲啼鳥

薄媚摘徧

雙調九  
十二字

薄媚摘徧

趙以夫

桂香消梧影瘦黃菊迷深院倚西風看落日長江東去

如練先生底事有賦飄然剛道為田園獨醒何為持杯  
自勸未能免 休把茱萸吟翫但管年年健千古事幾  
凭闌吾生九十強半歡娛終日富貴何時一笑醉鄉寬  
倒載歸來迴廊又月滿

滿江紅

又一體雙調九十  
三字亦名上江紅

滿江紅

澱山湖山

吳文英

雲氣樓臺分一派滄浪翠蓬開小景玉盆寒浸巧石盤

松風送流花時過岸浪搖晴棟欲飛空算鮫宮祇隔一  
紅塵無路通 神女駕臨曉風明月珮響丁東對兩蛾  
猶鎖怨綠煙中秋色未教飛盡鴈夕陽長是陸疎鐘又  
一聲欸乃過前巖移釣筒

前調

錢方蕙  
岩赴闕

吳文英

竹下門敲又呼起蝴蝶夢清閒裏看鄰牆梅子幾度仁  
生燈外江湖多夜雨月邊河漢獨晨星向草堂侵曉卷  
琴書猿鶴驚 宮漏靜朝馬鳴西風起已關情料希音

不在女瑟媧笙蓮蕩折香花未晚野舟橫渡水初晴看  
高鴻飛上碧雲中秋一聲

前調

牡丹

詹正

翠袖餘寒早添得銖衣幾重何須怪年華都謝更為誰  
容銜盡吳花成鹿苑人間不恨雨和風便一枝流落到  
人家清淚紅山霧濕倚薰籠垂匊葉鬢酥融恨宮雲  
一朵飛過空同白日長閒青鳥在楊家花落白蘋中問  
故人忍更負東風尊酒空



前調

風前  
斷笛

彭芳遠

愁滿關山又吹得蘆花雪深西樓外天低水湧龍挾秋  
吟回首人間無此曲數峰江上落餘音似斷雲飛絮兩  
悠悠何處尋江南路晴又陰聲韻改淚盈襟自中郎  
去後羽泛商沉牛背夕陽添別恨鸞膠秋月續琴心待  
醉騎黃鶴度蒼寒霜滿林

如魚水

雙調九

十三字

如魚水

柳永

輕靄浮空亂峰倒影潏潏十里銀塘遶岸垂楊紅樓朱  
閣相望芰荷香雙雙戲鷁鸂鶒駕鵝乍雨過蘭芷汀洲望  
中依約似瀟湘風澹澹水茫茫動一片晴光畫舫相  
將盈盈紅粉清商紫薇郎修禊飲且樂仙鄉便歸去徧  
歷鸞坡鳳沼此景也難忘

臨江仙

又一體雙調  
九十三字

臨江仙

柳永

夢覺小庭院冷風淅淅疎雨瀟瀟綺牕外秋聲敗葉狂  
飄心搖奈寒漏永孤幃悄淚燭空燒無端處是繡衾鴛  
枕閒過清宵蕭條牽情繫恨曾向年少偏饒覺新來  
憔悴舊日風標魂銷念歡娛事煙波阻後約方遙還經  
歲問怎生禁得如許無聊

浣溪紗慢

雙調九  
十三字

浣溪紗慢

周邦彥

水竹舊院落櫻筍新疏果嫩英翠幄紅杏交榴火心事  
暗卜葉底尋雙朶深夜歸青瑣燈盡酒醒時曉牕明釵  
橫鬢鞵怎生那被間阻時多奈愁腸數疊幽恨萬端  
好夢還驚破可怪近來傳語也無箇莫是嗔人呵真箇  
若嗔人却因何逢人問我

瀟湘夜雨

雙調九十三字與滿庭芳迥  
不同不可以別名混入也

瀟湘夜雨

燈花

趙長卿

斜點銀釭高擎蓮炬夜寒不禁微風重重簾幙捲堂中  
香漸遠長煙裊穠光不定寒影搖紅偏奇處當庭月暗  
吐焰如虹紅裳呈豔麗娥一見無奈狂蹤試煩他纖  
手捲上紗籠開正好銀花照夜堆不盡金粟凝空叮嚀  
語頻將好事報與主人公

梅子黃時雨

雙調九  
十三字

梅子黃時雨

別羅江諸友

張炎

流水孤村愛塵事  
頻消來訪深隱  
向醉裏誰扶滿身花  
影鷗鷺相看如瘦  
近來不是傷春病  
歎流景竹外野橋  
猶繫煙艇  
誰引斜川歸興  
便啼鵲縱少無奈  
時聽待棹擊空明  
漁湖千頃彈到琵琶  
留不住最愁人是黃昏  
近江風緊一行柳陰吹暝

惜秋華

雙調九

十三字

惜秋華

重九

吳文英

細響殘蛩傍燈前似說深秋懷抱怕上翠微傷心亂煙  
殘照西湖鏡掩塵沙翳曉影秦鬟雲擾新鴻喚淒涼漸  
入紅萸烏帽江上故人老視東籬秀色依然娟好晚  
夢趁隣杵斷乍將愁到秋娘淚濕黃昏又滿城雨輕風  
小閒了看芙蓉畫船多少

前調

七夕

吳文英

露胃朱絲小樓陰墮月秋驚華鬢宮漏未央當時鈿釵

遺恨人間夢隔西風算天上年華一瞬相逢縱相疎勝  
却巫陽無準何處動涼訊聽露井梧桐楚騷成韻綵  
雲斷翠羽散此情難問銀河萬古秋聲但望中婺星清  
潤輕俊度金鍼漫牽方寸

前調

又一體送人歸鹽官

吳文英

數日西風打秋林棗熟還催人去瓜果夜深斜河擬看  
星度匆匆便倒離尊悵遇合雲消萍聚留連有殘蟬韻  
晚時歌金縷綠水暫如許奈南牆冷落竹煙槐雨此



去杜曲已近紫霄尺五扁舟夜泊吳江正水珮霓裳無  
數看嫵問別來解相思否

前調

木芙蓉

吳文英

路遠仙城自玉郎去却芳卿憔悴錦段鏡空重鋪步幃  
新綺凡花瘦不禁秋幻膩玉腴紅鮮麗相攜試新妝乍  
畢交扶輕醉長記斷橋外驟玉驄過處千嬌凝睇昨  
夢頓醒依約舊時看翠愁邊暮合碧雲倩唱入六么聲  
裏風起舞斜陽闌干十二

露華憶

雙調九

十三字

露華憶

和寄  
聞韶

周密

曉消蕙雪漸水紋漾錦雲澹波容岸香玉蕊新枝輕裊  
條風次第鴈歸將近愛柳眉桃靨煙濃鴛鴦徑小芳屏聚  
蝶翠渚飄鴻六橋舊情如夢記扇底宮眉花下遊驄  
選歌試舞連宵戀醉瑤叢怕春早鶯啼醒睡箏鈿誰點  
愁紅心悄春嬌又入翠峰

探春

或加慢字雙  
調九十三字

探春

吳文英

苔徑曲深深不見故人輕敲幽戶細草春回目送流光  
一羽重雲冷哀鴈斷翠微空愁蝶舞暝鳴鞭遊蓬小夢  
枕殘驚寤還識西湖醉路向柳下竝鞍銀袍吹絮事  
影難追那負燈牀夜雨冰谿憑誰照影有明月乘興去  
暗相思梅孤瘦共江亭暮

淒涼犯

又一體雙調九十三  
字亦名瑞鶴仙引

淒涼犯

合肥  
秋夕

姜夔

綠楊巷陌西風起邊城一片離索馬嘶漸遠人歸甚處  
戍樓吹角情懷正惡更衰草寒煙淡薄似當時將軍部  
曲迤邐度沙漠追念西湖上小舫攜歌晚花行樂舊  
遊在否想如今翠彫紅落謾寫羊裙等新鴈來時繫著  
怕匆匆不肯寄與悞後約

卜算子慢

又一體雙調  
九十三字

卜算子慢

張先

溪山別意煙樹去程日落采蘋春晚欲上征鞍更掩翠  
簾回面相盼惜惜彎彎淺黛長長眼奈畫閣歡遊也學狂  
花亂絮輕散 水影橫池館對靜夜無人月高雲遠一  
晌凝思兩眼淚痕還滿難遣恨私書又逐東風斷綫夢  
澤層樓萬丈望湖城那見

滿庭芳

一名鎖陽臺一名滿湘  
夜雨雙調九十三字

滿庭芳

黃公度

一徑又分三亭鼎峙小園別是清幽曲闌低檻春色四  
時留怪石參差卧虎長松偃蹇虬攜筇晚風來萬里  
冷撼一天秋 優游消永晝琴尊左右賓主風流且偷  
閒不妨身在南州故國歸帆隱隱西崑往事悠悠都休  
問金釵十二滿酌聽輕謳

玉漏遲

雙調九  
十三字

玉漏遲

贈傅岩  
史納姬

蔣捷

翠鴛雙穗冷鶯聲喚轉春風芳景花湧袖香此度徐妝  
偏稱水月仙人院宇到處有西湖如鏡煙岫暝纖蔥悞  
指蓮峰篁嶺料想小閣初逢正浪拍紅猊袖飛金餅  
樓倚斜暉賸把佳期重省萬種惺忪笑語一點溫柔情  
性釵倦整盈盈背燈嬌影

洞仙歌

又一體雙調  
九十三字

洞仙歌

僧寶月

廣寒曉駕姑射尋仙侶  
偷被霜華送將去  
過越頻棲息  
南枝勻妝面凝酥輕聚愛橫管孤度  
隴頭聲盡撩得幽香為君分付水亭山驛  
衰草斜陽無限行人斷腸處  
盡為我留得多情何須待春風相顧  
任倒斷深思向梨花也無奈寒食幾番春雨




輓轡金井

又一體雙調  
九十三字

輓轡金井

劉過

水殿風涼賜環歸正是夢熊華旦夢雪羅輕稱雲章題  
扇西清侍宴望黃傘日華龍輦金券三王玉堂四世帝  
恩偏眷臨安記龍飛鳳舞信神明有後竹梧陰滿笑  
折花看素荷香紅潤功名歲晚帶河與礪山長遠麟脯  
杯行狨羈坐穩內家宣勸



御選歷代詩餘卷五十四

# 欽定四庫全書

集部

御選歷代詩餘卷五十五

詳校官中書<sub>臣</sub>潘有為

侍讀<sub>臣</sub>孫球覆勘

總校官進士<sub>臣</sub>朱 鈐

校對官學政<sub>臣</sub>翁樹棠

謄錄監生<sub>臣</sub>馬世昌

欽定四庫全書

御選歷代詩餘卷五十五目錄

九十  
三字

滿江紅

上

又一體

晏幾道

張先

柳永

二首

蘇軾

三首

晁補之

二首

賀鑄

程過

周紫芝

葛郊  
三首

周邦彥

蔡伸

趙師俠  
三首

張元幹

侯寘  
四首

張孝祥  
三首

范成大  
四首

陳三聘  
四首

辛棄疾  
二十首

程垓  
二首

京鏜

朱熹

曹冠

呂勝己

趙礪老

二首

袁去華

三首

劉克莊

四首

趙彥端

三首

管鑑

張鎡

欽定四庫全書

御選歷代詩餘



御選歷代詩餘卷五十五目錄

欽定四庫全書

御選歷代詩餘卷五十五

九十  
五字

司經局洗馬掌局事兼翰林院修撰加二級臣王奕清奉

旨校刊

滿江紅

上

又一體雙調  
九十三字

滿江紅

晏幾道

七十人稀曾記得少陵舊語誰知道五園菴主壽今如

許書底青瞳如月樣鏡中黑鬢無霜處與人間世味不  
相投神仙侶 文漢史詩唐句字晉帖碑周鼓這千年  
勲業一年一部灼灼紫芝商隱皓猗猗綠竹淇瞻武問  
先生何處更高歌凭椿樹

前調

張先

飄盡寒梅笑粉蝶遊蜂未覺漸迤邐水明山秀暖生簾  
幙過雨小桃紅未透舞煙新柳青猶弱記畫橋深處水  
邊亭曾偷約 多少恨今猶昨愁和悶都忘却擽從前

爛醉被花迷著晴鴿試鈴風力軟雛鶯弄舌春寒薄但  
只愁錦繡鬪妝時東風惡

前調

柳 永

訪雨尋雲無非是奇容豔色就中有天真妖麗自然標  
格花發姿顏歡喜面細追想處皆堪惜自別來幽怨與  
閒愁成堆積 鱗鴻阻無消息魂夢斷難尋覓儘思量  
休又怎生休得誰恁多情憑向道縱來相見還相憶便  
不成長遣似如今輕拋擲

前調

桐川

柳永

暮雨初收長川靜征帆夜落臨島嶼  
蓼煙疎澹葦風蕭索幾許漁歌飛短艇  
盡將燈火歸村落遣行人當此念回程  
傷漂泊桐江好煙漠漠波似染山如削  
遶嚴陵灘畔驚飛魚躍遊宦區區成底事  
平生況有雲泉約歸去來一曲仲宣樓  
從軍樂

前調

懷子由作

蘇軾

清潁東流愁目斷孤帆明滅遊宦處  
青山白浪萬重千

疊辜負當年林下意對牀夜雨聽蕭瑟恨此生長向別  
離中添華髮一尊酒黃河側無限事從頭說恍相看  
如昨許多年月衣上舊痕餘苦淚看間喜氣添黃色便  
與君池上覓殘春花如雪

前調

寄朱鄂州

蘇軾

江漢西來高樓下蒲萄深碧猶自帶岷峨雲浪錦江春  
色君是南山遺愛守我為劍外思歸客對此間風物豈  
無情殷勤說江表傳君休讀狂處士真堪惜對空洲

鸚鵡葦花蕭瑟獨笑書生爭底事曹公黃祖俱飄忽願  
使君還賦謫仙詩追黃鶴

前調

送友

蘇軾

天豈無情天也解多情留客春向暖朝來底事尚飄輕  
雪君過春來紆組綬我應歸去耽泉石恐異時杯酒忽  
相思雲山隔浮世事俱難必人縱健頭應白更何辭  
一醉此歡難覓欲向佳人訴離恨淚珠先已凝雙睫但  
莫遣新燕却來時音書絕

前調

謫玉山與  
諸父別

晁補之

莫話南征船頭轉三千餘里未歎此浮生飄蕩但傷佳  
會滿眼青山芳草外半篙碧水斜陽裏問此中何處艾  
荷深漁人指清時事羈遊意盡付與狂歌醉有多才  
南阮自為知己不似朱公江海去未成陶令田園計便  
楚鄉風景勝吾鄉何人對

前調

寄內

晁補之

月上西牕書幃靜燈明又滅水漏澀銅壺香燼夜霜如



雪睡眼不曾通夕閉夢魂爭得連宵接念碧雲川路古  
來長無由越鸞釵重青絲滑羅帶緩纖腰怯那更伊  
多感恨離傷別正是少年佳意氣漸當故里春時節歸  
去來莫放子規啼芳菲歇

前調

賀鑄

山繞平湖寒飈颺六雲紛泊清鏡曉倚巖琪樹繞雲珠  
閣窈窕紗牕褰翠幙尊前皓齒歌梅落信醉鄉絕境待  
名流供行樂時易久今猶昨歡莫再情何薄幸扁舟

不繫會尋佳約想見徘徊華表下箇身似是遼東鶴訪  
舊遊人與物俱非空城郭

前調

梅

程過

春欲來時長是與江梅有約還又向竹林疎處一枝開  
却對酒漸驚身老大看花因念人離索但十分沈醉祝  
東君長如昨 芳草渡孤舟泊山斂黛天垂幙黯銷魂  
無奈暮雲殘角便好折來和雪戴莫教酒醒隨風落待  
殷勤留此寄相思誰堪托

前調 催雪

周紫芝

寂寂江天雪又滿晚來風急空懊恨散鹽飛絮未成輕  
集萬里長空飛不到珠簾捲盡還羞入問向晚誰欲畫  
漁蓑寒江立天黯澹催殘日波浩渺添寒力又何如  
聊遣舞衣紅濕好與月娥臨晚砌莫教先放梅花拆便  
準擬一醉廣寒宮千山白

前調

葛 郊

家住苔西小池映青山一曲翠深裏猿呼鶴應短牆低

屋麥影離離翻翠浪泉聲瀲灩敲寒玉怪夜米有蟻出  
糟牀篳新綠和月種南陽菊饒雲買淇園竹任蠻爭  
觸戰世間榮辱兩目未消憑遠恨一筇費盡登山足便  
掉舟吹火荻花中鱸魚熟

前調

葛郊

捲盡珠簾楚天迴闌干幾曲最是好瑤臺歸路月翻銀  
屋深院數枰風入座高樓一噴雲橫玉看橘林霜淺未  
全黃猶懸綠悠然意淵明菊真如指國師竹這是非

識破都無榮辱不管浮生如蝶夢從教萬事添蛇足坐  
西崑一笑八千秋蟠桃熟

前調

葛 郊

郢客高歌猶未覩陽春一曲多應是連城有價闕藏華  
屋但使章臺無異意何妨一見邯鄲玉料錦囊隨客泛  
東溪凌波綠 難獨唱籬邊菊誰伴詠堦前竹想秋光  
不久又成虛辱過鴈不知蛩有恨行夔應笑蛇無足願  
為予落筆走盤珠爭圓熟

前調

周邦彥

晝日移陰攬衣起春帷睡足臨寶鏡綠雲撩亂未忺妝  
束蝶粉蜂黃都褪了枕痕一線紅生肉背畫闌脈脈悄  
無言尋碁局重會面猶未卜無限事縈心曲想秦箏  
依舊尚鳴金屋芳草連天迷遠望寶香薰被成孤宿最  
苦是蝴蝶滿園飛無心撲

前調

蔡伸

人倚金鋪顰翠黛盈盈墮墮話別處留連無計語嬌聲

咽十幅雲帆風力滿一川煙暝波光濶但回首極目望  
高城彈清血竝蘭舟停畫楫曾共醉津亭月最銷魂  
今夜月圓人缺楚岫雲歸空悵望漢皋珮解成輕別最  
苦是抑塞滿愁懷無人說

前調

趙師俠

渺渺春江迷望眼蒲萄漲綠春過也蕭疎庭戶寂寥心  
目念遠不禁啼鳩鬧愁多易遣修蛾蹙向小牕時把綵  
牋看翻新曲晴晝永便新浴相思淚不成哭空無言

顚顚暗消肌玉目斷碧雲無信息試憑青翼飛南北聽  
掀簾疑是故人来風敲竹

前調

趙師俠

煙浪連天寒尚峭空濛細雨春去也紅銷芳徑綠肥江  
樹山色雲籠迷遠近灘聲水急忘艱阻挂片帆掠岸晚  
風輕停煙渚浮世事皆如許名利役驚時序歎清明  
寒食小舟為旅露宿風餐安所賦石泉槐火知何處動  
歸心猶賴翠煙中無杜宇



前調

秋社  
桃花

趙師俠

露冷天高秋氣爽  
千林葉落驚初見  
小桃枝上盛開紅  
萼淺澹胭脂經雨洗  
翦裁碼碯如雲薄  
問素商何事鬪  
春工施丹蘄  
芙蓉苑顏如灼  
曾暗與花王約  
要來秋  
名字竝傳京雒  
回首瑤池高宴處  
桂花香裏驂鸞鶴  
但  
莫教容易逐西風  
輕飄却

前調

旅思

張元幹

春水連天桃花浪  
幾番風惡雲乍起  
遠山遮盡晚風還

作綠過芳洲生杜若楚帆帶雨煙中落認向來沙嘴共  
停橈傷飄泊寒猶在衾偏薄腸欲斷愁難著倚蓬牕  
無寐引杯孤酌寒食清明都過了可憐辜負年時約想  
小樓日日望歸舟人如削

前調

中秋上劉  
恭甫舍人

侯寘

天闊江南秋未老空江澄碧江外月飛來千丈水天同  
色萬屋覆銀清不寐一城踏雪寒無跡況楚風連陌競  
張燈如元夕山獠靜棠陰寂秋稼盛香醪直聽子城

吹角青樓橫笛不見蘇仙翻醉墨一篇水調銷金石念  
良辰美景賞心時誠難得

前調

侯寘

困頓春眠無情思夢魂飄泊檐外雨霏霏冉冉乍晴還  
落山黛四圍頻入眼柳絲一縷低縈閣念沈郎多感更  
傷春腰如削風入戶香穿箔花似舊人非昨任遊蜂  
雙燕經營拂掠海闊錦魚傳不到洞深紫鳳期難約謾  
彩牋牙管倚西牕題紅藥

前調

和徐叔至

侯寘

重到西湖春拆信  
露花酥滴倚危闌  
湖山佳處短屏著  
色擬泛一舟蒼莽  
岸恐傷萬里羈遊  
客賴欵門修竹有  
高人留狂跡  
傾蓋意真相得  
詩句裏曾相識  
看戛然飛動筆  
端金石照眼光  
浮瓊液滿斷腸  
翠擁宮韞窄  
問多情還肯借  
青鸞通消息

前調

侯寘

老矣何堪隨處是  
春衫酒滴醉狂時  
一揮十字貝光玉

色失意險為湘岸鬼浩歌又作長安客且乘流除却五  
侯門無車跡 驚人句天外得醫國手塵中識問鼎槐  
何似卧雲欹石夢裏略無軒冕念眼前豈是江湖窄拚  
蠅頭蝸角去來休休姑息

前調

張孝祥

秋滿灘源瘴雲靜曉山如簇動遠思空江小艇高丘喬  
木策策西風雙鬢底暉暉斜日朱闌曲試側身回首望  
京華迷南北 思歸夢天邊鵲遊宦事蕉中鹿想一年

好處砌紅堆綠羅帊分柑霜落齒冰盤剥芡珠盈掬借  
春纖縷鱠搗香釐新筍熟

前調

咏雨

張孝祥

斗帳高眠寒牕靜瀟瀟雨意南樓近更移三鼓漏傳一  
水點點不離楊柳外聲聲只在芭蕉裏也不管滴破故  
鄉心愁人耳無似有遊絲細聚復散真珠碎天應分  
付與別離滋味破我一牀蝴蝶夢輸他雙枕鴛鴦睡向  
此際別有好思量人千里

前調 冬至

范成大

寒谷春生薰叶氣玉筩吹穀新陽後便占新歲吉雲清  
穆休把心情關藥裏但逢節序添詩軸笑強顏風物豈  
非癡終非俗 清晝永佳眠熟門外事何時足且團團  
同社笑歌相屬著意調停雲露釀從頭檢舉梅花曲縱  
不能將醉作生涯休拘束

前調

雨後遊西湖  
荷花盛開

范成大

柳外輕雷催幾陣雨絲風急雷雨過半川荷氣粉融香

浥弄蕊攀條春一笑從教水濺羅衣濕打涼州簫鼓浪  
花中跳魚立山倒影雲千疊橫浩蕩舟如葉有采菱  
清些桃根雙櫂忘却天涯漂泊地尊前不放閒愁入任  
碧簫十丈卷金波長鯨吸

前調

范成大

竹裏行厨來問訊諸侯賓老春滿座彈絲未徧揮毫先  
了雲避仁風收雨脚日隨和氣熏林表向尊前來訪白  
髯翁衰何早志千里功名兆光萬丈文章耀洗冰壺



胸次月秋霜曉應念一堂塵網暗故將百和香雲繞算  
賞心情話古來多如今少

前調

范成大

罨畫溪山行欲徧風蒲還舉天漸遠水雲初靜掩樓人  
語月色波光看定玉虹橫卧金鱗舞算五湖今夜只  
扁舟追千古懷往事漁樵侶曾共醉松江渚只今年  
依舊一杯滄浦宇宙此身元是客不須悵望家何許但  
中秋時節好溪山皆吾土

前調

次石湖  
韻四首

陳三聘

薄日輕雲天氣好相將祈穀民情喜頌聲洋溢清風斯  
穆飲酒不多元有量吟詩無數添新軸對故人一笑我  
真愚君無俗斜川路經行熟黃花在歸心足問淵明  
去後有誰能屬神武衣冠驚夢裏江湖漁釣論心曲但  
從今散髮更披襟誰能束

前調

陳三聘

紺縠浮空山擁髻晚來風急吹驟雨藕花千柄豔妝新

浥窺鏡粉光猶有淚凌波羅襪何曾濕訝漢宮朝罷玉  
皇歸凝情立尊前恨歌三疊身外事輕飛葉悵當年  
空擊誓江孤楫雲色遠連平野盡夕陽偏傍疎林入看  
月明冷浸碧琉璃君須吸

前調

陳三聘

天豈無情天若道有情亦老功名事問天因甚蒙人不  
了好伴雲煙耕谷口休將翰墨傳江表箕鬢邊能得幾  
春風驚秋早陶令尹張京兆懷舒嘯貪榮耀盡南柯

一夢漏殘鐘曉  
滕閣暮霞孤鶩舉  
庾樓明月飛鳥繞  
念老來於此興無窮  
知音少

前調

陳三聘

斜日鎔金三萬頃  
棹歌齊舉風不動  
采蘋雙槳翠鬟相  
語月殿欲浮蟾兔  
魄海神不放魚龍  
舞到今宵秋氣十  
分清無今古  
君試喚扁舟侶  
來伴我瀟湘渚  
共夷猶春浪笑歌  
秋浦霸越獨高身  
退後塵纓未濯人  
誰許歎酒杯不到  
子陵臺劉伶土

前調

中秋  
寄遠

辛棄疾

快上西樓怕天教浮雲遮月但喚取玉纖橫笛一聲吹  
裂誰做冰壺涼世界最憐玉斧修時節問姮娥孤處有  
愁無應華髮雲液滿瓊杯滑長袖舞清歌咽歎十常  
八九欲磨還缺但願長圓如此夜人情未必看承別把  
從前離恨總包藏歸時說

前調

中秋

辛棄疾

美景良辰算只是可人風月況素節揚輝長是十分清

徹著意登樓瞻玉兔何人張幙遮銀闕倩飛廉特特為  
吹開憑誰說 弦與望從圓缺今與昨何區別羨夜來  
把手桂花堪折安得便登天柱上從容陪伴酬佳節更  
如今不聽塵談清愁如髮

前調

辛棄疾

可恨東君把春去春來無迹便過眼等閒輸了三分之  
一晝永暖翻紅杏雨風清扶起垂楊力更天涯芳草最  
關情烘殘日 湘浦岸南塘驛恨不盡愁如織算年年

辜負對他寒食便恁歸來能幾許風流早已非疇昔  
畫闌一線數飛鴻沈空碧

前調

辛棄疾

家住江南又過了清明寒食花徑裏一番風雨一番狼  
藉紅粉暗隨流水去園林漸覺清陰密算年年落盡刺  
桐花寒無力 庭院靜空相憶無說處閒愁極怕流鶯  
乳燕得知消息尺素如今何處也綠雲依舊無踪跡謾  
教人羞去上層樓平蕪碧

前調

賀王師宣  
平湖南寇

辛棄疾

笳鼓歸來舉鞭問何如  
諸葛人道是匆匆五月渡瀘深  
入白羽風生貔虎譟青溪路斷  
鼙鼙泣早紅塵一騎落  
平岡捷書急  
三萬卷龍頭客渾未得文章力  
把詩書  
馬上笑驅鋒鏑金印明年如斗大  
貂蟬却自兜鍪出待  
刻公勲業到雲霄  
浯溪石

前調

辛棄疾

漢水東流都洗盡  
髭鬚膏血人盡說君家飛將  
舊時英



烈破敵金城雷過耳談兵玉帳冰生頰想王郎結髮賦  
從戎傳遺業腰間劒聊彈鋏尊中酒堪為別況故人  
新擁漢壇旌節馬革裹尸當自誓蛾眉伐性休重說但  
從今記取楚臺風庾樓月

前調

江行

辛棄疾

過眼溪山怪都是舊時曾識還記得夢中行徧江南江  
北佳處徑須攜杖去能消幾兩平生屐笑塵勞三十九  
年非長為客吳楚地東西圻英雄事曹劉敵被西風

吹盡了無塵跡樓觀甫成人已去旌旗未卷頭先白歎  
人生哀樂轉相尋今猶昔

前調

辛棄疾

風卷庭梧黃葉墜新涼如洗一笑折秋英同賞弄香掇  
蕊天遠難窮休久望樓高欲下還重倚拚一襟寂寞淚  
彈秋無人會今古恨沈荒壘悲歡事隨流水想登樓  
青鬢未堪憔悴極目煙橫山數點孤舟月淡人千里對  
嬋娟從此話離愁金尊裏

前調

冷泉亭

辛棄疾

直節堂堂看夾道冠纓拱立漸翠谷羣仙來下珮環聲  
急誰信天鋒飛墮地傍湖千尺開青壁是當年玉斧削  
方壺無人識 山水潤琅玕濕秋露下瓊珠滴向危亭  
橫跨玉淵澄碧醉舞且搖鸞鳳影浩歌莫遣魚龍泣恨  
此中風物本吾家今為客

前調

再用前韻

辛棄疾

照影溪梅悵絕代佳人獨立便小駐雍容千騎羽觴飛

急琴裏新聲風響珮筆端醉墨鴉棲壁是使君文雅舊  
知名今方識高欲卧雲還濕清可漱泉長滴快晚風  
吹帽滿懷空碧寶馬嘶歸紅旆動龍團試水銅瓶泣怕  
他年重到路應迷桃源客

前調

送李提  
刑入蜀

辛棄疾

蜀道登天一盃送繡衣行客還自歎中年多病不堪離  
別東北看騰諸葛表西南更草相如檄把功名收拾付  
君侯如椽筆兒女淚君休滴荆楚路吾能識要新詩

準備廬山山色赤壁磯頭千古浪銅鞮陌上三更月正  
梅花萬里雪深時須相憶

前調

送佑之弟  
還侍浮梁

辛棄疾

塵土西風便無限淒涼行色還記取明朝應恨今宵輕  
別珠淚爭垂華燭暗鴈行欲斷哀箏切看扁舟幸自澀  
清溪休催發白石路長亭側千樹柳千絲結怕行人  
西去掉歌聲闌黃卷莫教詩酒污玉階不信仙凡隔但  
從今伴我又隨君佳哉月

前調

遊南岩  
和友

辛棄疾

笑拍洪崖問千丈翠崖誰削依舊是西風白鳥北村南  
郭似整復斜僧屋亂欲吞還吐林煙薄覺人間萬事到  
秋來都搖落呼斗酒同君酌更小隱尋幽約且丁寧  
休負北山猿鶴有鹿從渠求鹿夢非魚定未知魚樂正  
仰看飛鳥却應人回頭錯

前調

雪霽

辛棄疾

天上飛瓊畢竟向人間情薄還又跨玉龍歸去萬花搖

欽定四庫全書

御選歷代詩餘

卷五十五

十九

落雲破林梢添遠岫月明屋角分層閣記少年駿馬走  
韓盧掀東郭吟凍鴈嘲飢鵲人已老歡猶昨對瑤華  
滿地與君酬酢最愛霏霏迷遠近都收擾擾還空廓待  
羔兒飲罷又烹茶揚州鶴

前調

餞席

辛棄疾

莫折荼蘼且留取一分春色還待得青梅如豆共伊同  
摘少日對花渾醉夢而今醒眼看風月恨牡丹笑我倚  
東風頭如雪榆莢錢菖蒲葉時節換繁華歇算怎禁

風雨怎禁鷓鴣老冉冉兮花共柳是栖栖者蜂和蝶也  
不因春去有閒愁因離別

前調

辛棄疾

紫陌飛塵望十里雕鞍繡轂春未老已驚臺榭瘦紅肥  
綠睡雨海棠猶倚醉舞風楊柳難成曲問流鶯能說故  
園無曾相熟巖泉上飛鳬浴巢林下棲禽宿恨荼蘼  
開晚謾翻紅玉蓮社豈堪談昨夢蘭亭何處尋遺墨但  
羈懷空自倚鞦韆無心蹴



前調

山居  
即事

辛棄疾

幾箇輕鷗來點破一泓澄綠更何處一雙鷗鷺故來爭  
浴細讀離騷還痛飲飽看修竹何妨肉有飛泉日日供  
明珠三千斛春雨滿秧新穀閒日永眠黃犢看雲連  
麥隴雪堆蠶簇若要足時今足矣以為未足何時足被  
野翁相挾入東園枇杷熟

前調

和傅岩叟  
香月韻

辛棄疾

半山佳句最好是吹香隔屋又還怪冰霜側畔蜂兒成

簇更把香來薰了月却教影去斜侵竹似神清骨冷住  
西湖何由俗 根老大穿坤軸枝夭嫋龍蟠斛快酒兵  
長俊詩壇高築一再人來風味惡兩三杯後花緣熟記  
五更聯句失彌明龍銜燭

前調

呈趙晉  
臣數文

辛棄疾

老子平生原自有金盤華屋還又要萬間寒士眼前突  
兀一舸歸來輕似葉兩翁相對清如鵲到如今吾亦愛  
吾廬多松菊 人道是荒年穀還又似豐年玉甚等閒

却為鱸魚歸速野鶴溪邊留杖屨行人牆外聽絲竹問  
近來風月幾篇詩三千軸

前調

遊清  
風峽

辛棄疾

兩峽嶄巖間誰占清風舊築滿眼裏雲來鳥去澗紅山  
綠世上無人供嘯傲門前有客休迎肅怕淒涼無物件  
君時多栽竹風采妙凝冰玉詩句好餘膏馥歎只今  
人物一變應足人似秋鴻無定住事如飛彈須圓熟笑  
君侯陪酒又陪歌陽春曲

前調 憶別

程垓

門掩垂楊寶香度翠簾重疊春寒在羅衣初試素肌猶  
怯薄靄籠花天欲暮小風送角聲初咽但獨褰幽幌悄  
無言傷離別衣上雨看間月滴不盡顰空切羨棲梁  
歸燕入簾雙蝶愁緒多於花絮亂柔腸過似丁香結問  
甚時重理錦囊書從頭說

前調

程垓

水遠山明秋容淡不禁搖落況正是樓臺高處晚涼猶

薄月在衣裳風在袖冰生枕簟香生幙算四時佳處是  
清秋須行樂東籬下西牕角尋舊菊催新酌笑廣平  
何事對秋蕭索搖葉聲聲深院宇折荷寸寸閒池閣待  
歸來閒把木樨花重薰却

前調

京 鏜

乘興西來問誰是平生相識算只有瑤臺明月照人如  
昔萬里淒涼銀世界放教千丈冰輪出便招邀我輩上  
層樓橫孤笛陰晴事人難必歡樂處天常惜幸星稀

河澹雲收風息更著兩賢陪勝賞此身如與塵寰隔笑  
謫仙對影足成三空孤寂

前調

劉知郡  
生朝

朱熹

秀野詩翁念故山十年乖隔聊命駕朱門舊隱綠槐新  
陌好雨初晴仍半暖金缸玉笋開瑤席更流傳麗藻借  
江天留春色 過里社將兒姪談往事悲陳迹喜尊前  
見在鏡中如昔兩鬢全欺煙樹綠方瞳好映寒潭碧但  
一年一度一歸來歡何極

前調

曹冠

日暖煙輕竹梢映花陰凌亂微風皺池光弄碧綠楊垂  
岸豔杏牆頭紅粉媚幽蘭砌下飄香暖稱邀賓排日去  
尋芳頻歡宴光景速渾如箭醉夢裏春強半且花前  
莫厭玉杯頻勸一枕遊仙方警悟浮名自笑猶縈絆醉  
揮毫付與雪兒歌嬌鶯囀

前調

呂勝己

小立危亭風慘澹斜陽滿目望渺渺湘江一派楚山千

簇芳草連雲迷遠樹斷霞散綺飛孤鶩感騷人賦客向  
來詞愁如束嗟遠宦甘微粟驚世事傷浮俗且經營  
一醉未懷榮辱不見淵明歸去後一觴自泛東籬菊仰  
高風寂寞真生芻人如玉

前調

趙礪老

見說春時新波漲二川溶溢今底事沙痕猶褪石渠慳  
碧人意不須常作解興來便向杯中覓縱茂林修竹記  
山陰千年一薰吹動春工畢橋上景壺中日記梅肥



笋嫩雨微魚出只恐延英催入覲不教綠野長安逸任  
多情蝴蝶滿園飛狂縱跡

前調

趙礪老

西郭園林湖光淨暮寒清溢明月上近環山翠遠搖天  
碧粉澤蘭膏違俗尚巖花磴蔓從誰覓問近來錨腳許  
何人吾其一 歡樂事休教畢經後夜思前日想無心  
不競水雲流出物外煙霞供嘯咏箇中魚鳥同休逸又  
何須浮海訪三山尋仙跡

前調

袁去華

香霧空濛檐牙外流螢自照夜向久明河東畔電飛雲  
繞錯落疎星垂屋角須臾萬弩鳴林杪漸蒼梧翠竹嫩  
涼生驚秋早人語靜籤聲杳珍簾冷紗幮小想雲牕  
依舊夢尋難到鴈足空來書斷絕看頭頭著愁多少縱  
琴心細寫有誰知朱絃悄

前調

滕王閣

袁去華

畫棟珠簾臨無地滄波萬頃雲盡歛西山橫翠半江沈

影斜日明邊回白鳥晚煙深處迷漁艇聽棹歌遊女採  
蓮歸聲相應 愁似織人誰省情縱在歡難更滿衣香  
猶是舊時荀令宦海歸來塵撲帽酒徒散盡霜侵鬢最  
愁處獨立詠蒼茫西風勁

前調

都下作

袁去華

社雨初晴煙光暖吳山滴翠望絳闕祥雲虧蔽粉垣千  
雉萬柳低垂春似酒微風不動天如醉徧嬉嬉萬井畫  
圖中歡聲裏 嗟倦客道傍李看人事槐根蟻立蒼茫

俯仰漫悲身世靖節依然求縣令元龍老去空豪氣便  
乘興一葉泛滄浪吾歸矣

前調

夜雨涼甚忽  
動從戎之興

劉克莊

金甲凋戈記當日轅門初立磨盾鼻一揮千紙龍蛇猶  
濕鐵馬曉嘶營壁冷樓船夜渡風濤急有誰憐猿臂故  
將軍無功級平戎策從軍什零落盡慵收拾把茶經  
香傳時時溫習生怕客談榆塞事且教兒誦花間集歎  
臣之壯也不如人今何及

前調

夜飲海棠花下

劉克莊

老子年來頗自許，心腸鐵石尚一點。消磨不盡愛花成，癖懊惱每嫌寒勒住。丁寧莫被晴烘拆，奈暄風烈日太無情。如何得，張畫燭頻頻，惜憑素手，輕輕摘更一番雨。過彩雲無迹，今夕不來花下飲。明朝空向枝頭覓，對殘紅滿院，杜鵑啼添愁寂。

前調

范尉梅谷

劉克莊

赤日黃埃夢不到，清溪翠麓空健羨。君家別墅幾株幽

獨骨冷肌清偏要月天寒日暮猶宜竹想主人杖屨遶  
千迴山南北寧委澗嫌金屋寧映水羞銀燭歎出羣  
風韻背時裝束競愛東鄰姬傅粉誰憐空谷人如玉笑  
林逋何遜謾為詩無人讀

前調

劉克莊

落日登樓誰管領倦游狂客待喚起滄浪漁父隔江吹  
笛看水看山身尚健憂晴憂雨頭先白對暮雲不見美  
人來遙天碧山中鶴應相憶沙上鷺渾相識想石田

茅屋草深三尺空有鬢如潘騎省斷無面見陶彭澤便  
盡傾海水浣衣塵難湔滌

前調

茶蘼

趙彥端

千種繁春春已去翩然無跡誰信道茶蘼枝上靜中收  
得曉鏡洗妝非粉白晚衣弄舞餘衫碧繁寶鈿珠珥不  
勝持濃陰夕金翦度還堪惜霜蝶睡無從覓知幾多  
清夢釀成冰骨天女散花無酒聖仙人種玉慚香德悵  
攀條記得鬢絲青東風客

前調

餞盧光祖  
赴鼎州幕

趙彥端

津鼓鼕鼕三老醉知誰留得都不記琵琶洲畔草青江  
碧桃李春風吹不斷煙霞秋興清無極悵尊前桂子有  
餘香曾相識殘雨晝初涼夕高燭爛新醅白聽長歌  
歡意不知愁色父老能尋循吏傳關河暫枉諸侯客待  
日邊一紙詔黃飛勝相憶

前調

趙彥端

賜被薰鑪曾同見宮槐重綠時歸看綺疏疊嶂楚腰翻



曲君過蓬山輕歲月我懷廬阜分符竹道別離待得再  
歸來人應俗春欲動醅初熟追一笑森三玉且相對  
青眼共裁紅燭小語人家閒意態淺寒都下新裝束念  
平生和雨醉東風從今足

前調

錢別張  
子儀

管鑑

百罰深杯都不記歸來時節彷彿聽重城更鼓催成離  
闌江上愁心山斂翠津頭夜色沙如雪漸中年懷抱更  
深交難為別歌聲緩行雲歇尊酒散香塵滅想來宵


何處亂山明月得意春風羣玉府第名早晚黃金闕但  
相思莫遣鴈來時音書絕

前調

賞梅呈  
洪內翰

張 鉉

玉照梅開三百樹香雲同色光搖動一川銀浪九霄珂  
月幸遇勲華時世好歡娛況是張燈夕更不邀名勝賞  
東風真堪惜 盤誥手春秋筆今內相斯文伯肯閒迎  
軒蓋遠過泉石奇事人生能幾見清尊花畔須教側到  
鳳池却欲醉鷗邊應難得



御選歷代詩餘卷五十五